

四庫全書

集部

欽定四庫全書

集部

曲江集卷一至六

詳校官侍郎臣謝墉

檢討臣何思鈞覆勘

總校官進士臣朱鈐

校對官中書臣翁樹棠

謄錄監生臣蔡本任

欽定四庫全書

集部二

曲江集

別集類一唐

提要

臣等謹案曲江集二十卷唐張九齡撰九齡字子壽韶州曲江人官至尚書右丞相貶荊州長史卒贈荊州大都督謚文獻事迹具唐書本傳徐浩作九齡墓碑稱其學究精義文叅微旨而不及其文集卷數唐宋二史藝文

志俱載有九齡文集二十卷其後流播稍稀  
惟明文淵閣書目有曲江文集一部四冊又  
一部五冊而外間多未之覩成化間邱濬始  
從內閣錄出韶州知府蘇韓為刊行之其卷  
目與唐志相合蓋猶宋以來之舊本也九齡  
守正嫉邪以道匡弼稱開元賢相而文章高  
雅亦不在燕許諸人下新唐文藝傳載徐堅  
之言謂其文如輕縑素練實濟時用而窘邊

幅今觀其感遇諸作神味超軼可與陳子昂  
方駕文筆宏博典實有垂紳正笏氣象亦具  
見大雅之遺堅局於當時風氣以富艷求之  
不足以爲定論至所撰制草明白切當多得  
王言之體本傳稱爲秘書少監時會賜渤海  
詔而書命無足爲者乃命九齡爲之被詔趣  
成尋遷工部侍郎知制誥今檢集中有渤海  
王大武藝書當即其時所作而其他詔命亦

多可與史傳相參考如集中有勅奚都督右  
金吾衛大將軍歸誠王李歸國書而核之唐  
書外國傳所載奚事自開元以後僅有李大  
酺魯蘇李詩延寵安固請名而不及歸國知  
記載有所脫漏是尤可以補史之闕矣乾隆  
四十六年十一月恭校上

總纂官

臣紀昀

臣陸錫熊

臣孫士毅

孫士毅

總校官

臣陸

費

墀

欽定四庫全書

曲江集卷一

唐張九齡撰

頌贊賦

龍池聖德頌

臣聞昔者玄德升聞皇天眷命元聖有作上帝何言必  
見意於休徵不忘象於幽贊惟茲降鑒若曰專精道周  
萬物者其神尤功濟生人者其祥大粵若古始肇有君

臣巢燧之前寂寞無紀書契而後煥炳可觀若乃鬼神  
睢盱品彙紛錯性命未正吉凶不定而太昊氏將通其  
德則河為之出圖人食耒粒鳥獸是茹時不耕稼器無  
耒耜而神農氏將教其本則天為之雨粟蚩尤不道炎  
帝不制銅鐵鑄兵豺狼橫厲而軒轅氏將禁其暴則天  
為之降玄女洪水方割下民昏墊堯德莫能弭其災舜  
功不能除其害而夏后氏將底其績則洛為之出書自  
茲以還殆三千歲矣其間木火更生雲物告符有若狼



銜鉤魚躍舟素靈哭黃星見豈不以湯德有慙武善未  
盡漢道既雜魏方亦偏唯以一至之應且為興王之兆  
則未有天錫真符聖受明命遠與大禹相續超與上皇  
比崇如我國家之盛者焉洪惟龍池蓋天之所以祚聖  
即今上下居之舊真京師爽塏之所傍無竇澤中勿濫  
泉非常而靈液涓流無幾而神池浸廣榮光休氣若烟  
若雲所未嘗有則此之出清可以鑑而深不見底鱗介  
瑰詭於叔其中時莫知其所然日徒見其有異中宗採

識者之議壓王氣而來遊聖上處或躍之時出飛龍而合應臨淄始封也卽第在馬上黨歷試也靈符紹至天其以是永命我唐圖象丁寧有所底止其若茲也夫成數有時而否至理無代而亡固在乎大聖之生乘運而作鼓天下之動安天下之危故將順成功自古之啓佑也如彼克定多難自天之叶贊也如此初中宗違代后黨窺隙大盜狃於得志羣慝起而擅權若綴旒然當此時也天與若不取鬼謀或不協則我祖宗之業無乃將

墜而億兆之命亦猶倒懸聖上蹙之提劍而起雷霆一  
奮袂沴以清內難既衰外虞有謐推戴太上照臨萬邦  
實天之為與人更始系皇統維乾綱決綻補壞蕩瑕滌  
穢而乃闕典咸備舊章悉舉處窮盡達在困必通品物  
資以再生寰區為之一變然後返華偽於朴還澆漓於  
淳以大道為原以至仁為根動推是心以御於事人見  
德而興行神享誠而介福故不在於刑罰不在於禱請  
大造裁成玄猷充塞有如陽春播澤觸類皆滋太山起

雲無遠不徧雖昆蟲草木與蠻貊要荒樂其所生安其所習在牛羊而勿踐有干戈而載戢又況於衣冠華夏禮樂家邦而不刑於斯須不久於漸漬者也夫然何教非德何化非經何能事之不舉何醇精之未極周溥洋溢於戲緝熙至於太和莫不允若體侔天地之大事出皇王之表豈擎蹠曲拳盡禮極力將用彥聖不啻其口所能稱誦於吾君所可殆庶於至德且往者之有開也天感精以降聖聖敬命以奉天此誠有元則欽明文思

及茲報本必嚴祇齋栗靈慶以屬之神化以答之與初  
相明其徵乃著絲綸先兆非篤信歟由是言之統天者  
人合符者聖而差德序命殊尤卓絕豈多乎哉至如古  
之興王必有所感五帝更尚五運旁通土者黃中之精  
於金為王水者善利之物於土為配苟應期而有來必  
合德而為表是則然矣天其或者亦以阜育羣化發揮  
茂祉始告以聖有明徵終成乎帝之神冊因其立象之  
本會以相乘之數則載代六百厯紀千年變而通之胡

可量也宗子宗正卿褒信郡王璆等若干人伯父伯兄仲叔季弟聚族相與詣闕上言天意昭著固已久矣人事符合亦云至矣而一德是建太階既平靈臺靈沼赫赫明明天之為大雖莫能名皇王之鎬豈無頌聲上初克讓抑而未許至於累請乃曰俞哉史臣不敏敢獻頌曰

茫茫元昊載凝載薄在帝庖犧繼天而作浩浩洪水包山襄陵舜亦命禹夏氏以興龍圖龜書二王是膺湯武

已下夫何足徵

右元命

於鑠巨唐乘運而起續禹之迹系堯之紀五聖在天丕  
命曾孫高視河洛同符混元亦有黃龍出於靈沼明明  
穆穆天子之表

右聖德

倬彼東井昭章于天沉精降液下為靈泉靈泉有泚其  
深無底泌之洋洋其甘如醴清德之鑑柔道之體洪源

濬規實天之啓

右靈泉

濯濯靈泉洞冥皇祇滋液流行化為神池曰止曰行唯  
聖之作匪鱸匪鮪惟龍之躍植物斯生動物斯樂天眼  
有見曾是不涸

右神池

靈有休氣紛紛郁郁如山之色如雲之簇潛龍在下瞻  
烏斯屋兆云其吉周爰咨詢既契我龜又叶我人鎬雖



舊京其命維新

右休氣

蜿蜿黃龍神池自出靈化恍惚噴雲沃日告帝之符其  
儀孔吉或潛于泉或見于田與時順動亦應乎天克配  
我皇無得稱焉

右黃龍

開元紀功德頌并序

臣聞蠻夷猾夏唐虞已然天之所生類不可絕嘗有拓

境者矣而固也為患或有款塞者矣而必也無親是以古之哲王審其若此則限以荒服斷非純臣不貢不王武功居後不庭不率文德是先三代所以直道百蠻所以向化迨乎春秋之衰諸侯以力征伐自出戎心大啓謀夏亂華干盟偪好王綱弛而若綴天道厭而將革則有強能攘劫暴息交侵雖雜霸之無成亦反經之所取其負力者乃塹山堙谷盡境而築長城其黷武者則輓粟飛芻窮兵以耗中國又失於下策而悔在末年彼王

畧之不恢殆千餘載矣夫有其虞而無豫思其患而不  
圖所謂能國將安貴聖物豈終否道非固窮鑑之者昊  
天救之者英主玄命陰隲畀付神武我太宗一戎衣而  
大定我皇帝再受命而太平不是古而務文不非今而  
忘戰以時變而消息與天元而合符日月之所照臨陰  
陽之所陶冶凡有在地莫不稟朔而東夏郡縣北隴山  
戎先是四十年侵軼數百里自茲氣奪數以病告既威  
讓之不恭且力制之不可或朝或否為虺為蛇幽鄭未

遑以滅烽邊城安得而弛柝曠日持久兵連禍挈率  
由事邊是無寧歲二十二年春乃命右羽林大將軍兼  
御史中丞幽州長史張守珪將中軍都督諸鎮雄名先  
路夷裔生風載馳信臣繼發精卒戒嚴有赫張皇若神  
公卿大夫未始測也將校部曲亦莫知也皇帝方日靖  
以慮之乾綱以斷之初決策於九重已收功於萬里矣  
二十二年冬十有二月中貴將命元戎受律三軍疾雷  
於非時二庭喪膽於非意欲遁則衆潰不保欲拒則兵

鋒莫當因而偽降幸且紓禍遽圖反覆將肆鴟張觀釁  
先人豈伊負我以間諜而情得乘猜攜而計從或奇兵  
以嘗或厚利以啗無何變作果自族誅兇元惡首鬼惑  
神誘假天威而無前覆鳥巢而何有於是諸部大駭率  
衆復歸責以不義之尤捨其不臣之罪既服即序有威  
且懷載籍以來固未之見也昔我睿祖取句驪如拾遺  
今茲聖謀易林胡於反掌獻功有績後嗣無忘百王所  
廢之勲四夷未賓之俗自我底定巍乎登皇其若此也

於是彼節使與羣帥因東師之凱旋離而族談合而公  
議以為主上憫一隅之苦垂不代之畧以計易戰以兵  
去兵神斷自天虜平不日且軍未血刃敵免膏原密承  
無方之謀坐致不陣之捷有征無戰即王者之師歟而  
不彰美於吾君得無臣子之罪不表聖於帝載曷稱文  
武之時乃率其屬至於固請帝三讓德而曰俞哉夫曲  
成萬類者天為而不有下濟兆庶者聖成而不居物無  
謝生於天雖云至道人無歸功於聖何以最靈雖無已

無名所宜絕於言象而惟忠與義固不廢於頌述大雅  
云徐方既同天子之功又曰明明天子令聞不已其此  
之謂也臣再拜頓首敢獻頌曰

赫赫天威兮被遐荒蠢茲山戎兮不來王命南仲兮整  
六師出幽陵兮輶九夷簸赤山兮蕩滄海弔無告兮伐  
有罪徒不勤兮車不殆虜震驚兮兵氣倍昔負固兮今  
安在魁自殲兮裔既平謀既集兮聖自明我不戰兮獻  
戎捷俾啓後兮揚天聲

聖應圖贊并序

臣聞啓聖者天也宜有以覺悟受命者聖也必有以明徵故神不言而可知時將至而先兆當陛下龍潛上黨也或託類於雲物或效靈於卜筮天之意者丁寧垂象唯恐後時又以潞水之泓深山鹿之捷走馳騎是獲厲流不濡非力所能以明或躍乾之上體時在九四神道幽贊聖期密邇自後而占何著明其若此蓋天福海內地降聖跡以瑞非常之后以決如神之策至于再三明



必信耳有郡掾崔弼時其從行見龍騎先馳謂河流可  
涉亦既數步遽已滅頂不沉也安足以驗飛無凡也於  
何以昭聖事來自久命常惟新臣不勝至願謹為聖圖  
遂獻贊曰

龍之或躍泉有可深神亦成象化為背禽凌厲是獲明  
命則忱如彼從掾焉能不沉

開元正厯握乾符頌并序

臣伏見景寅制書以開元厯握乾符垂示天下幸甚其

沙門玄侶等所言益部耆舊傳洛下閎改顓頊厯推校  
最為精密而曰後八百歲其厯差一日當有聖人定之  
到于今厯果有差聖果有定誠非常之嘉應曠代之靈  
符不可得而間也臣誠歡誠喜臣聞天道先聖而啓期  
聖人後天而奉時不當乎天心不在厯數不登乎聖道  
不合元符玄命定而王者應幽數起而明者察故洛下  
閎極其數而知來耆舊傳尚其占而示後我皇帝無思  
而感自然而同僧玄侶等幸會而言豈云素慮非人事

也非神道也天固已儲祥以俟時積分以差日出入數  
代多歷年所疇人極力不能課其祥上林雜候亦莫徵  
其失則明天意以俟聖期期數未臻乃藏於密聖證將  
至如應如響彼幽深之何有此會通之不謀所以下叶  
黃鍾上稽玄象以和六氣以合三光復其見心間不容  
髮斗樞且運而況於人時元氣已調而況於月令於戲  
天下之動日用不知昆蟲草木生者自遂麟鳳龜龍靈  
者自瑞蠻夷戎狄遠無不至山川鬼神幽固不洎此聖

人所以定天下之象通天下之志天人之道備也昔者  
河出圖洛出書自時厥後符命非一空文而無應其殆  
乎人為實錄而有徵焉用乎龍負則洛下閎者此其神  
乎不然是何見之明也夫聖有時而不作物無聖而不  
覩仲尼感時於鳳鳥古人嘆壽於清河皆傷於不達而  
恨於難見我后受成命重光乎文武累聖而無窮殊祥  
而無數彼哀命者曾不得而朝聞凡今之人誠何幸而  
目覩由是觀之當其來運唐虞之屋可封非其有時孔

丘之徒不遇也千載之會也萬物豈知其謝生於天乎  
兆人亦云忘力於帝乎微臣荷寵靈揚休命則臣子之  
志在於盡美而惟天之大終莫能名不勝區區敢獻頌  
曰

於皇惟后受命于天時來于今兆是厥先既定乃日允  
叶斯年赫赫光明應于上玄

白羽扇賦并序

開元二十四年夏盛暑奉勅使大將軍高力士賜宰臣

白羽扇其與焉竊有所感立獻賦曰

當時而用任物所長彼鴻鵠之弱羽出江湖之下方安  
知煩暑可致清涼豈無紈素采畫文章復有修竹剖析  
毫芒提攜密邇搖動馨香惟衆珍之在御何短翮之敢  
當預竊恩於聖后且見持於未央伊昔臯澤之時亦有  
雲霄之志苟效用之得所雖殺身而何忌肅肅白羽穆  
如微風縱秋氣之移奪終感恩於篋中

御批答

朕頃賜扇聊以滌暑卿立賦之且見情素詞高理妙朕  
詳之久矣然佳彼勁翮方資利用與夫弃捐篋笥義不  
同也

荔枝賦并序

南海郡出荔枝焉每至季夏其實乃熟狀甚瓌詭味特  
甘滋百果之中無一可比余往在西掖嘗盛稱之諸公  
莫之知而固未之信唯舍人彭城劉侯弱年累遷經屆  
南海一聞斯談倍復喜歎以為甘旨之極也又謂龍眼

凡果而與荔枝齊名魏文帝方引蒲桃及龍眼相比是時二方不通傳聞之大謬也每相顧閒議欲為賦述而世務卒卒此志莫就及理郡暇日追叙往心夫物以不知而輕味以無比而疑遠不可驗終然永屈況士有未效之用而身在無譽之間苟無深知與彼亦何以異也因道揚其實遂作此賦

果之美者厥有荔枝雖受氣於震方實稟精於火離乃作酸於南裔爰負陽以從宜蒙休和之所播涉寒暑而



匪虧下合圍以擢本傍蔭畝而抱規紫紋紺理黛葉綃  
枝翦鬱而憲霽環合而芬纚如蓋之張如帷之垂雲煙  
沃若孔翠于斯靈根所盤不高不卑陋下澤之沮洳惡  
層崖之嶮巖彼前志之或妄何側生之見疵爾其勾芒  
在辰凱風入律肇允含滋芬敷謐溢綠穗靡靡青英苾  
苾不豐其華但甘其實如有意乎敦本故微文而妙質  
蒂葯房而攢萃皮龍鱗以駢比膚玉英而含津色江萍  
以吐日朱苞剖明璫出罔然數寸猶不可匹未玉齒而

殆銷雖瓊漿而可軼彼衆味之有五此甘滋之不一伊  
醇淑之無算非精言之能悉聞者歡而竦企見者訝而  
驚竒心恚可以蠲忿口爽可以忘疾且欲神於醴露何  
比數於甘橘援蒲桃以見擬亦古人之深疾若乃華軒  
洞開嘉賓四會時當燠煜客或煩憤而斯果在焉莫不  
心侈而體忭信雕盤之仙液實玳筵之綺績有終食於  
累百愈益氣而治內故無厭於所甘雖不貪而必愛沉  
美李而莫取浮甘瓜而自退豈一座之所榮冠四時之

為最夫其貴可以薦宗廟其珍可以羞王公亭十里而  
莫致門九重兮曷通山五嶠兮白雲江千里兮清楓何  
斯美之獨遠嗟爾命之不逢每被銷於凡口罕獲知於  
貴躬柿何稱乎梁侯梨何幸乎張公亦因人之所遇孰  
能辯乎其中哉

曲江集卷一

欽定四庫全書

曲江集卷二

唐 張九齡 撰

詩

奉和聖製南郊禮畢酺宴

配天昭聖業率土慶輝光  
春發三條路酺開百戲場  
流恩均庶品縱觀聚康莊  
妙舞來平樂新聲出建章  
分曹日抱戴赴節鳳歸昌  
幸奏承雲樂同晞湛露陽  
氣和皆

有感澤厚自無疆飽德君臣醉連歌奉柏梁

奉和聖製早渡蒲津關

魏武中流處軒皇問道迴長堤春樹發高掌曙雲開  
龍負王舟渡人占仙氣來河津會日月天仗役風雷  
東顧重關盡西馳萬國陪還聞股肱郡元首詠康哉

奉和聖製幸晉陽宮

隋季失天策萬方罹凶殘皇祖稱義旗三靈皆獲安  
聖期將申錫王業成艱難盜移未改命歷在終履端  
彼汾

惟帝鄉雄都信鬱盤二月朔巡狩羣后陪清鑒霸迹在  
沛庭舊儀覩漢官唐風思何深舜典敷更寬戶蒙粉榆  
復邑爭牛酒歡緬惟剪商後豈獨徵禹歎三后既在天  
萬年斯不刊尊祖實我皇天文皆仰觀

奉和聖製同二相南出雀鼠谷

設險諸侯地承平聖主巡東君朝二月南旆擁三辰寒  
出重關盡年隨行漏新瑞雲叢捧日芳樹曲迎春舞詠  
先馳道恩華及從臣汾川花鳥意併奉屬車塵

奉和聖製次成皋先聖擒建德之所

天命誠有集王業初惟艱剪商自文祖夷項在茲山地  
識斬蛇處河臨飲馬間威加昔運往澤流今聖還尊祖  
頌先烈賡歌安用攀紹成即我后封岱出天關

奉和聖製過王濬墓

漢皇思鉅鹿晉將在弘農入蜀舉長筭平吳成大功與  
渾雖不協歸浩實為雄孤績淪千載流名感聖衷萬乘  
渡荒隴一顧凜生風古節猶不棄令人爭効忠



奉和聖製經孔子舊宅

孔門太山下不見登封時徒有先王法令為明主思思  
加萬乘幸禮致一牢祠舊宅千年外光華空在茲

奉和聖製經河上公廟

昔者河邊叟誰知隱與仙姓名終不識章句此空傳跡  
為坐忘晦言猶強著詮精靈竟何所祠宇獨依然道在  
紆宸睠風行動睿篇從茲化天下清淨復何先

奉和聖製賜諸州刺史以題座右

聖人合天德洪覆在元元每勞蒼生念不以黃屋尊興  
化俟羣辟擇賢守列藩得人此為盛容岳今復存降鑒  
引君道慇懃啓政門容光無不照有象必為言成憲知  
所奉致理歸其根肅肅稟玄猷煌煌戒朱軒豈徒任遇  
重兼爾宴錫繁載聞勵臣節持答明主恩

奉和聖製瑞雪篇

雜言

萬年春三朝日上御明臺旅庭實初瑞雪兮霏微俄同  
雲兮蒙密此時騷切陰風生先過金殿有餘清信宿嬋

娟飛雪度能使玉人俱掩嫵皓皓樓前月初白紛紛陌  
上塵皆素昨訝驕陽積數旬始知和氣待迎新匪惟在  
人利曾是扶天意天意豈云遙雪下不崇朝皇情翫無  
斲雪委方盈尺草樹紛早榮京坻宛先積君恩誠謂何  
歲稔復人和預數斯箱慶應如此雪多朝冕旒兮載悅  
想簞笠兮農節倚瑤琴兮或歌續薰風兮瑞雪福浸昌  
應尤盛瑞雪年年常感聖願以栢梁作長為柳花詠

奉和聖製早發三鄉山行七言

羽衛森森西向秦山川歷歷在清晨晴雲稍卷寒巖樹  
宿雨能銷御路塵聖德由來合天道靈符即此應時巡  
遺賢一一皆羈致猶欲高深訪隱淪

奉和聖製溫泉歌

雜言

有時神物待聖人去後湯還冷來時樹亦春今茲十月  
自東歸羽旆逶迤上翠微溫泉谷蔥蔥佳氣色離宮奕奕  
斗光輝臨渭川近天邑浴日溫泉復在茲羣仙洞府那  
相及吾君利物心玄澤浸蒼黔漸漬神湯無疾苦薰歌

一曲感人深

奉和聖製燭龍齋祭

四言

上帝臨下鑒亦有光孰云陰隲惟聖克彰六月徂暑四  
郊魯陽我后其勤告于壇場精意允溢羣靈鼓舞蔚兮  
朝雲霈然時雨雨我原田亦既有年燭龍煌煌明宗報  
祀予以助之天人帝子聞詩有訓國風茲始

奉和聖製喜雨

四言

艱我稼穡載育載亨如物應之曷聖與靈謂我何憑惟

德之馨誰云天遠以誠必至太清無雲義和頓轡于斯  
蒸人瞻彼非覲陰冥倏忽霈澤咸洎何以致之我后之  
感無皋無隰黍稷黝黝無卉無木敷芬黝黝黃龍勿來  
鳴鳥不思人和年豐皇心則怡豈與周宣雲漢徒詩

奉和聖製送十道採訪使及朝集使

三年一上計萬國趨河洛課最力已陳賞延恩復博垂  
衣深共理改瑟其咸若首路迴竹符分鑣揚木鐸戒程  
有攸往詔餞無淹泊昭晰動天文殷勤在民瘼持久望

茲念克終期所託行已當自強春耕庶秋獲

奉和聖製次瓊岳韻

山祇亦望幸雲雨見靈心岳館逢朝霽闕門解宿陰咸  
京天上近清渭日邊臨我武因冬狩何言是即禽

奉和聖製送李尚書入蜀

眷言感忠義何有間山川徇節今如此離情空復然皇  
心在勤恤德澤委昭宣周月成功後明年或勞還

奉和聖製初出洛城

東土淹龍駕西人望翠華山川祇詢物宮觀豈為家十  
月迴星斗千官捧日車洛陽無怨思巡幸更非賒

奉和聖製謁元皇帝廟齋

興運昔有感建祠北山巔雲雷初締構日月今悠然紫  
氣尚翳鬱玄元如在焉迨茲事追遠輪奐復增鮮洞府  
香林處齋壇清漢邊吾君乃尊祖夙駕此留連樂動人  
神會鍾成律度圓笙歌下鸞鶴芝朮萃靈仙曾是福黎  
庶豈唯味虛玄賡歌徒有作微薄謝昭宣



西郊文武出入舒和之樂

四言樂章

祝史辭正人神慶叶福以德昭享以誠接六變云備百  
禮斯浹祀事孔明祚流萬葉

奉和聖製龍池篇

天啓神龍生碧泉泉水靈源浸迤延飛龍已向珠潭出  
積水仍將銀漢連岸傍花柳看勝畫浦上樓臺問是仙  
我后元符從此得方為萬歲壽圖川

南郊太尉酌獻武舞作凱安之樂

樂章

馨香惟后德明命光天保肅祀崇聖靈陳信表皇道玉  
戚初蹈厲金匱既靜好介福何穰穰精誠格穹昊

奉和聖製送尚書燕國公赴朔方

宗臣事有征廟筭在休兵天與三台座人當萬里城朔  
南方偃革河右暫揚旌寵錫從仙禁光華出漢京山川  
勤遠畧原隰軫皇情為奏薰琴唱仍題寶劍名聞風六  
郡伏計日五戎平山甫歸應疾留侯功復成歌鍾旋可  
望枕席豈難行四牡何時入吾君憶履聲

奉和聖製途經華山

萬乘華山下千巖雲漢中  
靈居雖突密睿覽忽玄同  
日月臨高掌神仙仰大風  
攢峯勢岌岌翊輦氣雄雄  
揆物知幽贊銘勲表聖衷  
會應陪檢玉來此告成功

奉和聖製早登太行山率爾言志

孟月攝提貞乘時我后征  
晨嚴九折度暮戒六軍行  
日御馳中道風師卷太清  
戈鋌林表出組練雪間明  
動植希皇豫高深奉睿情  
陪遊七聖列望幸百神迎  
氣色煙

猶喜恩光草尚榮之果稱萬歲今此復同聲

奉和聖製登封禮畢洛城酺宴

大君畢能事端宸樂成功運與千齡合  
懽將萬國同漢  
酺歌聖酒韶樂舞薰風河洛榮光遍雲煙喜氣通  
春華  
頓覺早天澤倍知崇草木皆沾被猶言不在躬

奉和聖製經函谷關作

函谷雖云險黃河復已清  
聖心無所隔空此置關城

奉和聖製渡潼關口號

隱嶙故城壘荒涼空戍樓在德不在險方知王道休

奉和吏部崔尚書雨後大明朝堂望南山

迢遞終南頂朝朝閭闔前  
朅來青綺外高在翠微先  
雙鳳褰為闕羣龍儼若仙  
還知到玄圃更是謁甘泉  
夜雨塵初滅秋空月正懸  
詭容紛入望霽色宛成妍  
東極華陰踐西彌嶠冢連  
奔峯出嶺外瀑水落雲邊  
漢帝宮將苑商君陌與阡  
林華鋪近甸煙靄遶晴川  
既庶仁斯及分憂政已宣  
山公啓事罷吉甫頌聲傳  
濟濟金門步洋洋

洋玉樹篇徒歌雖有屬清越豈同年

和黃門盧監望秦始皇陵

秦帝始求仙驪山何遽卜中年既無效茲地所宜復徒  
役如雷奔珍怪亦雲蓄黔首無寄命赭衣相馳逐人怨  
神亦怒身死宗遂覆土崩失天下龍關入函谷國為項  
籍屠君同華元戮始掘既由楚終焚乃因牧上宰議楊  
賢中阿感桓速一聞過秦論載懷空杼軸

蘇侍郎紫微庭各賦一物得芍藥

仙禁生紅藥微芳不自持幸因清切地還遇艷陽時名  
見桐君錄香聞鄭國詩孤根若可用非直愛華滋

和崔黃門寓直夜聽蟬之作

蟬嘶玉樹枝向夕惠風吹幸入連宵聽應緣飲露知思  
深秋欲近聲靜夜相宜不是黃金飾清香徒爾為

和姚令公從幸溫湯喜雪

萬乘飛黃馬千金狐白裘正逢銀霰積如向玉京遊瑞  
色鋪馳道花文拂綵旒還聞吉甫頌不共郢歌儔

和秋夜望月憶韓廣等諸侍郎因以投贈吏部

侍郎李林甫

秋天碧雲夜明月懸東方皓皓庭際色稍稍林下光  
桂華澄遠近璧綵散池塘鴻鴈飛難度關山曲易長  
揆予秉孤直虛薄忝文昌握鏡慙先照持衡愧後行  
多才衆君子載筆久辭塲作賦推潘岳題詩許謝康  
當時陪宴語今夕恨相忘願欲接高論清晨朝建章

和吏部李侍郎見示秋夜望月憶諸侍郎之什



其卒章有前後行之戲因命僕繼作

清秋發高興涼月復閒宵光逐露華滿情因水鏡搖同  
持亦所見異路無相招美景向空盡歡言隨事銷忽聽  
金華作誠如玉律調南宮尚為後東觀何其遼名數雖  
云隔風期幸未遙今來重餘論懷此更終朝

和崔尚書喜雨

積陽雖有晦經月未為災上念人天重先祈雲漢迴仁  
心及草木號令起風雷照爛陰霞上交紛瑞雨來三辰

破黍稷四達屏氛埃池溜因添滿林芳為酒開聽中聲  
滴漉望處影徘徊惠澤成豐歲昌言發上才無論驗石  
鼓不是御雲臺直頌皇恩浹崇朝遍九垓

和王司馬折梅寄京邑昆弟

離別念同嬉方榮欲共持獨攀南國樹遙寄北風時林  
惜迎春早花愁去日遲還聞折梅處更有棣華詩

和許給事直夜簡諸公

未央鍾漏晚仙宇藹沉沉武衛千廬合嚴扃萬戶深左

掖知天近南窻見月臨樹搖金掌露庭徙玉樓陰他日  
聞更直中宵屬所欽聲華大國寶夙夜近臣心逸興乘  
高閣雄飛在禁林寧思竊抃者情發為知音

和裴侍中承恩拜掃旋轡途中有懷寄州縣官

寮鄉園故親

嵩岳神惟降汾川鼎氣雄生才作霖雨繼代有清通天  
下稱賢相朝端挹至公自家來佐國移孝入為忠霜露  
多前感邱園想舊風扈巡過晉北問俗到河東便道恩

華降還鄉禮教崇野搏延故老朝服見兒童

和姚令公哭李尚書

貴賤雖殊等平生竊下風雲泥勢已絕山海納還通  
歎登龍者翻將弔鶴同琴詩猶可託劒履獨成空疇昔  
嘗論禮興言每匪躬人思崔琰議朝掩祭遵公作善神  
何酷依仁命不融天文虛北斗人事罷南宮上宰既傷  
舊下流迷惑衷無恩報國士徒欲問玄穹

張丞相與余有孝廉校理之舊又代余為荊州

故有此贈襄州刺史宋鼎

漢上登飛幟荆南歷舊居已嘗臨砌橘更覩躍池魚  
德繼微眇深衷能卷舒義申蓬閣際情坦廟堂初郡挹  
文章美人懷變理餘皇恩儻照亮豈厭承明廬

酬宋使君作

時來不自意宿昔謬樞衡翊聖負明主妨賢媿友生罷  
歸猶右職待罪尚南荆政有留裳舊風因繼組成高軒  
問疾苦丞庶荷仁明衰廢時所薄祇言僚故情

酬通事舍人寓直見示篇中兼起居陸舍人景

獻

軒掖殊清秘才華固在斯興因膏澤洒情與惠風吹所  
美應人譽何私亦我儀同聲感喬木比翼謝長離價以  
陸生減賢慙鮑叔知薄遊嘗獨愧芳訊乃兼施此夜金  
閨籍伊人瓊樹枝飛鳴復何遠相顧幸媿媿

和黃門廬侍郎詠竹

清切紫庭垂歲蕤防露枝色無玄月變聲有惠風吹高

節人相重虛心世所知  
鳳凰佳可食一去一來儀

和蘇侍郎小園夕霽寄諸弟

清風閭闔至軒蓋承明歸  
雲月愛秋景林堂開夜扉  
何言兼濟日尚與宴私違  
興屬蒹葭變文因棠棣飛  
人倫用忠厚帝德已光輝  
贈弟今為貴方知陸氏微

和韋尚書答梓州兄南亭宴集

棠棣聞餘興烏衣有舊遊  
門前杜城陌池上曲江流  
暇日嘗繁會清風詠阻修  
始知西峙嶽同氣此相求

陸平  
原贈

弟有子為東  
峙嶽之句

與袁補闕尋蔡拾遺會此公出行後蔡有五韻  
詩見贈以此篇答焉

轍迹陳家巷詩書孟子鄰偶來乘興者不值草玄人契  
是忘年合情非累日申聞君還薄暮見眷及茲辰贈我  
如瓊玖將何報所親

酬趙二侍御使西軍贈兩省舊寮

石室先鳴者金門待制同操刀嘗願割持斧竟稱雄應



敵兵初起緣邊虜欲空使車經隴月征旆繞河風忽枉  
兼金訊非徒秣馬功氣清蒲海曲聲滿栢臺中顧已塵  
華省欣君震遠戎明時獨匪報嘗欲退微躬

答陳拾遺贈竹簪

與君嘗此志因物復知心遺我龍鍾節非無玳瑁簪幽  
素宜相重雕華豈所任為君安首飾懷此代兼金

答太常新博士見贈一絕

上苑春先入中園花盡開唯餘幽徑草尚待日光催

酬宋使君見貽

陟隣初稟訓獻策幸逢時朝列且云忝君恩復若茲庭  
闈際海曲輶傳荷天慈顧已歡烏烏聞君泣素絲才明  
應主召福善豈神欺但願白心在終然涅不緇

武司功初有幽庭春暄見貽夏首獲見以詩報  
馬

芳月盡離居幽懷重起予雖言春事晚尚想物華初  
日暉方照高齋澹復虛筍成林向密花落樹應疎贈鯉

情無間求鶯思有餘暄妍不相待含歎欲焉如

贈澧陽韋明府

君有百鍊刃堪斷七重犀誰開太阿匣持割武城雞  
竟與尚書佩還應天子提何時遇操宰當使玉如泥

酬周判官巡至始興會改秘書少監見貽之作  
兼呈耿廣州

惟昔遷樂土迄今已重世陰慶荷先德素風慙後裔  
唯益梓桑恭豈稟山川麗干時初自勉揆已無兼濟瘠土

資勞力良書啓蒙蔽一探石室文再擢金門第既起南  
宮草復掌西掖制過舉及小人便蕃在中歲亞司河海  
秩轉牧江湖蒞勿謂符竹輕但覺涓塵細一麾尚云忝  
十駕宜求稅心息已如灰跡牽且為贅忽捧天書委將  
草海隅弊朝聞循誠節夕飲蒙瘴厲義疾恥無勇盜憎  
攻亦銳葵霍是傾心豺狼何返噬履險甘所受勞賢惡  
相曳攬轡但荒服循陔便私第嘉慶始獲申恩華復相  
繼無庸我先舉同事君猶滯當推奉使績且結拜親契

更延懷安旨曾是慮危際善謀雖若茲至理焉可替所  
仗有神道况承明主惠

在洪州答綦毋學士

旬雨不愆期由來自若時爾無言郡政吾豈欲天欺常  
念涓塵益惟歡草樹滋課成非所擬人望在東菑

酬王六霽後書懷見示

雲雨俱行罷江天已洞開炎氛霽後滅邊緒望中來作  
驥君垂耳為魚我曝鰓更憐湘水賦還是洛陽才

酬王六寒朝見詒

賈生流寓日揚子寂寥時在物多相背唯君獨見思  
漁為江上曲雪作郢中詞忽枉兼金訊長懷伐木詩

酬王履震遊園林見詒

宅生惟海縣素業守郊園中覽霸王說上徵明主恩一  
行罷蘭逕數載歷金門既負潘生拙俄從周任言逶迤  
戀軒陛蕭散反邱樊舊徑稀人跡前池耗水痕併看芳  
樹老唯覺敝廬存自我棲幽谷逢君翳覆盆孟軻應有

命賈誼得無冤江上傷行遠林間偶避喧地偏人事絕  
時霽鳥聲繁獨善心俱閑窮居道共尊樂因南澗藻憂  
豈北堂萱幽意加投漆新詩重贈軒平生徇知己窮達

與君論

曲江集卷二



欽定四庫全書

曲江集卷三

唐 張九齡 撰

詩

祭南岳事畢謁司馬道士

將命祈靈嶽迴策詣真士絕跡尋一徑異香聞數里分  
庭八桂樹肅容兩童子入室希把袖登牀願啓齒誘我  
弃智訣迨茲長生理吸精反自然鍊藥求不死斯言眇

霄漢顧予嬰紛滓相去九牛毛慙嘆知何已

登樂遊原春望書懷

城隅有樂遊表裏見皇州策馬既長遠雲山亦悠悠萬壑清光滿千門喜氣浮花間直城路草際曲江流憑眺茲為美離居方獨愁已驚玄髮換空度綠萸柔奮翼籠中鳥歸心海上鷗既傷日月逝且欲桑榆收豹變焉能及鷺鳴非可求願言從所好初服返林邱

登襄陽恨峴山

昔年亟攀踐征馬復來過信若山川舊誰如歲月何蜀  
相吟安在羊公碣已磨令圖猶寂寞嘉會亦蹉跎宛宛樊  
城岸悠悠漢水波逶迤春日遠感寄客情多地本原林  
秀朝來煙景和同心不同賞留歎此巖阿

九月九日登龍山

郡庭常窘束涼野求昭曠楚客凜秋時桓公舊臺上清  
明風日好歷落江山望極遠何蕭條中留坐惆悵東彌  
夏首閭西拒荆門壯夷險雖異時古今豈殊狀先賢眇

不接故老猶可訪投弔傷昔人揮斤感前匠自為本疎  
散未始忘幽尚際會非有欲往來是無妄為邦復多幸  
去國殊遷放且泛籬下菊還聆郢中唱灌園亦何為於  
陵乃逃相

三月三日登龍山

伊川與霸津今日祓除人豈似龍山上還同湘水濱衰  
顏憂更老淑景望非春禊飲豈吾事聊將偶俗塵

晚霽登王六東閣

試上江樓望初逢山雨晴連空青嶂合向晚白雲生彼  
美要殊觀蕭條見遠情情來不可極日暮水流清

登郡城南樓

閑閣幸無事登樓聊永日雲霞千里開洲渚萬形出澹  
澹澄江漫飛飛度鳥疾邑人半艫艦津樹多楓橘感別  
時已屢憑眺情非一遠懷不我同孤興與誰恚平生本  
單緒邂逅承優秩謬忝為邦寄多慙理人術駕駘雖自  
勉倉廩素非實陳力儻無效謝病從芝朮

歲初巡屬縣登高安南樓言懷

山城本孤峻，憑高結層軒。  
江氣偏宜早，林英粲已繁。  
餘滋含宿霽，衆妍在朝暉。  
拂衣釋簿領，伏檻遺紛喧。  
深俯東溪澳，遠延南山樊。  
歸雲納前嶺，去鳥投遙村。  
目盡有餘意，心惻不可諼。  
竭來彭蠡澤，載經敷淺原。  
春及但生思，時哉無與言。  
不才叨過舉，唯力酬明恩。  
美化猶寂蔑，迅節徒飛奔。  
雖無成立效，庶以去思論。  
行復徇孤迹，亦云吾道存。

登城樓望西山

城樓枕南浦日夕顧西山  
宛宛鸞鶴處高高煙霧間  
仙井今猶在洪崖久不還  
金編誰我授羽駕亦難攀  
簷際千峰遠雲中一鳥閒  
縱觀窮水國遊思遍人寰  
勿復塵埃事歸來且閉關

候使石頭驛樓

山檻憑高望川途眇北流  
遠林天翠合前浦日華浮  
萬井緣津渚千艘咽渡頭  
漁商多末事耕稼少良疇  
自守

金匱山房集卷三  
陳蕃榻嘗登王粲樓徒然騁目處豈是獲心遊向跡雖  
愚谷求名異盜止息陰芳木所空復越鄉憂

登荊州城樓

天宇何其曠江城坐自拘層樓百餘尺迢遞在西隅暇  
日時登眺荒郊臨故都累累見陳迹寂寂想雄圖古往  
山川在今來郡邑殊北疆雖入鄭東距豈防吳幾代傳  
荊國當時敵陝郢上流空有處中土復何虞枕席夷三  
峽關梁豁五湖承平無異境守隘莫論夫自罷金門籍



來參竹使符端居向林藪微尚在桑榆直似王陵慙非  
如甯武愚今茲對南浦乘鴈與雙鳬

登荊州城望江

滔滔大江水天地相終始經閱幾世人復歎誰家子東  
望何悠悠西來晝夜流歲月既如此為心那不愁

秋晚登樓望南江入始興郡路

潦收沙衍出霜降天宇晶伏檻一長眺津途多遠情思  
來江山外望盡煙雲生滔滔不自辨役役且何成我來

颯衰鬢孰云影華纓樗馬苦蹉跎籠禽念遐征歲陰向  
晚晚日夕空屏營物生貴得性身累由近名內顧覺今  
是追歎何時平

登臨沮樓

高深不可厭巡屬復來過本與衆山絕况茲韶景和危  
樓入水倒飛檻向空摩雜樹緣青壁樛枝掛綠蘿潭清  
能徹底魚樂好跳波有象言難具無端思轉多同懷不  
在此孤賞欲如何

登古陽雲臺

庭樹日衰颯風霜未云已  
駕言遣憂思乘興求相似  
楚國茲故都蘭臺有餘址  
傳聞襄王世仍立巫山祀  
方此全盛時豈無嬋娟子  
色荒神女至魂蕩宮觀啓  
蔓草今如積朝雲為誰起

陪王司馬登薛公逍遙臺

嘗聞薛公淚非直  
雍門琴竄逐留遺跡  
悲涼見此心府中  
因暇豫江上幸招  
尋人事已成古風  
流獨至今閒情

多感歎清景暫登臨無復甘棠在空餘蔓草深晴光送  
遠目勝氣入幽襟水去朝滄海春來換碧林賦懷湘浦  
弔碑想漢川沉曾是陪遊日徒為梁甫吟

賀給事嘗詣蔡起居郊館有詩因命同作

記言聞直史築室面層阿豈不承明入終云幽意多沉  
冥高士致休澣故人過前嶺游氛滅中林芳氣和茲辰  
阻佳趣望美獨如何

嘗與大理丞袁公太府丞田公偶詣一所林沼

尤勝因並坐其次相得甚歡遂賦詩焉以詠其事

方駕與吾友同懷不異尋偶逢池竹處便會江湖心夏  
近林方密春餘水更深清華兩輝映閒步亦窺臨蘋藻  
復佳色鳧鷖亦好音韶芳媚洲渚蕙氣襲衣襟蕭散皆  
為樂徘徊從所欽謂予成夙志歲晚共抽簪

與生公尋幽居處

同方入厭俗相與事遐討及此雲山去窅然巖徑好疑

入武陵源如逢漢陰老清諧欣有得幽閒歛盈抱我本  
玉堦侍偶訪金仙道茲焉求卜築所過皆神造歲晚林  
始敷日晏崖方杲不種緣嶺竹豈植臨潭草即途可淹  
留隨目成黼藻期為靜者說曾是終焉保今為簡書畏  
祇令歸思浩

與生公遊石窟山

探秘孰云遠忘懷復爾同日尋高深意宛是神仙中躋  
險邁靈室詭制非人功潛洞黝無底殊庭忽似夢豈如

武安鑿自若茅山通造物良有寄嬉遊迺愜衷猶希咽  
玉液從此昇雲空咄咄共攜手泠然且馭風

林亭詠

穿築非求麗幽閒欲寄情偶懷因壤石真意在蓬瀛苔  
益山文古池添竹氣清從茲果蕭散無事亦無營

郡舍南有園畦雜樹聊以永日

為郡久無補越鄉空復深苟能秉素節安用叨華簪却  
步園畦裏追吾野逸心形骸拘俗吏光景賴閒林內訟

誠知止外言猶匪忱成蹊謝李逕衛足感葵陰榮達豈  
不偉孤生非所任江城何寂歷秋樹亦蕭森下有北流  
水上有南飛禽我願從歸翼無然坐自沉

臨泛東湖時任洪州

郡庭日休暇湖曲邀勝踐樂職在中和虛心挹上善乘  
流坐清曠舉目眺悠緬林與西山重雲因北風卷晶明  
畫不逮陰影鏡無辨晚秀復芬敷秋光更遙衍萬族紛  
可佳一遊豈能展羈孤忝邦牧顧已非時選梁公世不



容長孺心亦褊永念出籠縶常思退疲蹇歲徂風露嚴  
日恐蘭荈剪佳辰不可得良會何其鮮罷興還江城閉  
關聊自遣

始興南山下有林泉嘗卜居焉荊州卧病有懷  
此地

出處各有在何者為陸沉幸無迫賤事聊可祛迷襟世  
路少夷坦孟門未嶮嶮多慙入火術常惕履冰心一跌  
不自保萬全焉可尋行行念歸路耿耿惜光陰浮生如

過隙先達已吾箴敢忘邱山施亦云年病侵力衰在所  
養時謝良不任但憶舊棲息願言遂窺臨雲間目孤秀  
山下面清深蘿蔦自為幄風泉何必琴歸此老吾老還  
當日千金

高齋閒望言懷

高齋復晴景延眺屬清秋風物動歸思煙林生遠愁紛  
吾自窮海薄宦此中州取路無高足隨波適下流歲華  
空冉冉心曲且悠悠坐惜芳時歇胡然久滯留

與弟遊家園

定省榮君賜來歸是晝遊林鳥飛舊里園菓讓先秋枝  
長南庭樹池連北澗流星霜屢爾別蘭麝為誰幽善積  
家方慶恩深國未酬棲棲將義動安得久情留

郡內閒齋

郡閣晝常掩庭蕪日復滋簷風落鳥毳窻葉掛蟲絲拙  
病宦情少羈閒秋氣悲理人無異績為郡但經時唯有  
江湖意沉冥空在茲

晨出郡舍林下

晨興步北林蕭散一開襟復見林上月娟娟猶未沉片  
雲自孤遠叢篠亦清深無事由來貴方知物外心

司馬崔頌和

優閒表政清林薄賞秋成江上懸曉月往來虧復盈天  
雲抗直意郡閣晦高名坐嘯應無欲寧辜濟物情

晨坐齋中偶而成詠

寒露潔秋空遙山紛在矚孤頂乍脩聳微雲復相續人

茲賞地遍鳥亦愛林旭結念憑幽遠撫躬曷羈束仰霄  
謝逸翰臨路嗟疲足徂歲方睽攜歸心亟躑躅休閒儻  
有素豈負南山曲

園中時蔬盡皆鋤理唯秋蘭數本委而不顧彼  
雖一物有足悲者遂賦二章

場藿已成歲園葵亦向陽蘭時獨不偶露節漸無芳  
異菁為蓄甘非蔗有漿人多利一飽誰復惜馨香

幸得不鋤去孤苗守舊根無心羨旨蓄豈欲近名園遇

賞寧充佩為生莫礙門幽林芳意在非是為人論

城南隅山池春中田袁二公盛稱其美夏首獲

賞果會夙言故有此詠

憶昨聞佳境駕言尋昔蹊非唯初物變亦與舊遊睽幽  
渚為君說清晨即我攜逢深獨睥睨歷險共攀躋林笋  
苞青籜津楊委綠萋荷香初出浦草色復緣堤樂處將  
鷗狎譚端用馬齊且言臨海郡兼話武陵溪異壤風煙  
絕空山巖徑迷如何際朝野從此待金閨

林亭寓言

林居逢歲晏，遇物使情多。  
蘅茝不時與，芬榮素汝何。  
更憐籬下菊，無如松上蘿。  
因依自有命，非是隔陽和。

南山下舊居閒放

祗役已云久，乘閒返服初。  
塊然屏塵事，幽獨坐林閭。  
清曠前山遠，紛喧此地疎。  
喬木凌青靄，修篁媚綠渠。  
耳和繡翼鳥，目暢錦鱗魚。  
寂寞心還閉，飄飄體自虛。  
興來命旨酒，臨罷閱仙書。  
但樂多幽意，寧知有毀譽。  
尚想爭名

者誰云要路居都忘下流歎傾奪竟何如

感遇

蘭葉春葳蕤桂華秋皎潔欣欣似生意自爾為佳節誰知林棲者聞風坐相悅草木有本心何求美人折

幽林歸獨卧滯慮洗孤清持此謝高鳥因之傳遠情日夕懷空意人誰感至精飛塵理自隔何所慰吾誠

魚遊樂深池鳥棲欲高枝差爾蜉蝣羽薨薨亦何為有生豈不化所感奚若斯神理日微滅吾心安得知浩歎



楊朱子徒然泣路歧

孤鴻海上來池潢不敢顧側見雙翠鳥巢在三株樹  
矯矯珍木巔得無金丸懼美服患人指高明逼神惡  
今我遊冥冥弋者何所慕

吳越數千里夢寐今夕見形骸非我親衾枕即鄉縣  
化蝶猶不識川魚安可羨海上有仙山歸期覺神變

西日下山隱北風乘夕流燕雀感昏旦簷楹呼匹儔  
鴻鵠雖自遠哀音非所求貴人弃疵賤下士嘗殷憂  
衆情

累外物怨已忘內修感歎長如此使我心悠悠

江南有丹橘經冬猶綠林豈伊地氣暖自有歲寒心可  
以薦嘉客奈何阻重深運命推所遇循環不可尋徒言  
樹桃李此木豈無陰

永日徒離憂臨風懷蹇脩美人何處所孤客空悠悠青  
鳥跂不至朱鸞誰云浮夜分起躑躅時逝曷淹留

抱影吟中夜誰聞此歎息美人適異方庭樹含幽色白  
雲愁不見滄海飛無翼鳳皇一朝來竹花斯可食

漢上有游女求思安可得袖中一札書欲寄雙飛翼冥  
冥愁不見耿耿徒緘憶紫蘭秀空蹊皓露奪幽色馨香  
歲欲晚感歎情何極白雲在南山日暮長太息

我有異鄉憶宛在雲溶溶憑此目不覯要之心所鍾但  
欲附高鳥安敢攀飛龍至精無感遇悲惋填心胷歸來  
扣寂寞人願天豈從

閉門蹟群化憑林結所思嘯歎此寒木疇昔迺芳蕤朝  
陽鳳安在日暮蟬獨悲浩思極中夜深嗟欲待誰所懷

誠已矣既往不可追鼎食非吾事雲仙嘗我期胡越方  
杳杳車馬何遲遲天壤一何異幽嘿卧簾帷

當塗界寄裴宣州

故人宣城守亦在江南偏如何分虎竹相與間山川章  
綬胡為者形骸非自然含情津渡濶倚望脰空延遠近  
聞佳政平生仰大賢推心徒有屬會面良無緣日夕遵  
前渚江村投暮煙念行祇意默懷遠豈言宣委曲風波  
事難為尺素傳

敬酬當塗界留贈宣州刺史裴耀卿

茂生寔王佐，仲舉信時英。  
氣覩衝天發，人將下榻迎。  
珪符肅有命，江國遠徂征。  
九派期方越，千鈞或可輕。  
高帆出風迫，孤嶼入雲平。  
遙邁嗟于役，離憂空自情。  
飭簪陪早歲，接壤廁專城。  
曠別心彌軫，宏規義轉傾。  
徒然恨飢渴，况乃諷瑤瓊。

曲江集卷三

欽定四庫全書

曲江集卷四

唐 張九齡 撰

詩 口號

餞王尚書出邊

漢相推人傑  
殷宗伐鬼方  
還聞出將重  
坐見即戎良  
上策應為豫  
中權且用光  
令申兵氣倍  
威懾虜魂亡  
樹比公孫大  
城如道濟長  
夏雲登隴首  
秋露抵遼陽  
武德舒

宸睠文思饒樂章感恩身既許激節膽猶嘗祖帳傾朝  
列軍麾駐道傍詩人何所詠尚父欲鷹揚

送趙都護赴安西

將相有更踐簡心良獨難遠圖嘗畫地超拜乃登壇戎  
即崑山叙車同渤海單義無中國費情必遠人安他日  
文兼武而今粟且寬自然來月窟何用刺樓蘭南至三  
冬晚西馳萬里寒封侯自有處征馬去嘽嘽

送使廣州



家在湘源住君今海嶠行經過正中道相送倍為情心  
逐書郵去形隨世網嬰因聲謝遠別緣義不緣名

送姚評事入蜀各賦一物得卜肆

蜀嚴化已久沉冥空所思嘗聞賣卜處猶憶下簾時驅  
傳應經此懷賢儻問之歸來說往事歷歷偶心期

送竇校書見錢得雲中辨江樹

江水連天色無涯淨野氛微明岸傍樹凌亂渚前雲舉  
棹形隨轉登艫意漸分渺茫從此去空復惜離羣

餞王司馬入計同用洲字

元寮行上計舉餞出林邱  
忽望題興遠空思解榻遊  
別筵鋪柳岸征棹倚蘆洲  
獨歎湘江水朝宗向北流

東湖臨泛餞王司馬

南土秋雖半東湖草未黃  
聊乘風日好來泛芰荷香  
蘭棹無勞速菱歌不厭長  
忽懷京洛去難與共清光

餞濟陰梁明府各探一物得荷葉

荷葉生幽渚芳華信在茲  
朝朝空此地采采欲因誰  
但

恐星霜改還將蒲稗衰懷君美人別聊以贈心期

餞陳學士還江南同用徵字

荷篠旋江澳銜杯餞霸陵別前林鳥息歸處海煙凝風  
土鄉情接雲山客念憑聖朝巖穴選應待鶴書徵

通化門外送別

屢別容華改長愁意緒微義將私愛隔情與故人歸薄  
宦無時賞勞生有事機離魂今夕夢先繞舊林飛

送楊道士往天台

鬼谷還成道天台去學仙行應松子化留與世人傳此地煙波遠何時羽駕旋當須一把袂城郭共依然

送楊府李功曹

平生屬良友結綬望光輝何知人事拙相與宦情非別路穿林盡征帆際海歸居然已多意況復兩鄉違

送宛句趙少府

解巾行作吏樽酒謝離居修竹含清景華池澹碧虛地將幽興愜人與舊遊疎林下紛相送多逢長者車

送韋城李少府

送客南昌尉離亭西候春  
野花看欲盡林鳥聽猶新  
別酒青門路歸軒白馬津  
相知無遠近萬里尚為鄰

送蘇主簿赴偃師

我與文雄別胡然邑吏歸  
賢人安下位驚鳥欲卑飛  
激節輕華冕移官徇綵衣  
羨君行者樂從此拜庭闈

送廣州周判官

海郡雄蠻落津亭壯越臺  
城隅百雉映水曲萬家開  
里

樹枕榔出時禽翡翠來觀風猶未盡早晚使車迴

別鄉人南還

橘柚南中暖桑榆北地陰何言榮落異因見別離心  
吾亦江鄉子思歸夢寐深聞君去水宿結思渺雲林  
牽綴從浮事遲迴謝所欽東南行舫遠秋浦念猿吟

郡南江上別孫侍御

雲嶂天涯盡川途海縣窮何言此地僻忽與故人同  
身負邦君弩情紆御史驄王程不我駐離思逐秋風

奉酬洪州江上見贈監察御史孫翊

受命讞封疆逢君牧豫章於焉審虞芮復爾共舟航  
別秋陰盡懷歸客思長江皋枉離贈持此慰他鄉

江上遇疾風

疾風江上起鼓怒揚煙埃白晝晦如夕洪濤聲若雷  
投林鳥鍛羽入浦魚曝腮瓦飛屋且發帆快檣已催  
不知天地氣何為此喧阗

初發江陵有懷

極望潯陽浦江天渺不分扁舟從此去鷗鳥自為羣他  
日懷真賞中年負俗紛適來果微尚倏爾會斯文復想  
金閨籍何如夢渚雲我行多勝寄浩思獨氛氲

自豫章南還江上作

歸去南江水磷磷見底清轉逢空濶處聊洗滯留情浦  
樹遙如待江鷗近若迎津途別有趣况乃濯吾纓

道逢北使題贈京邑親知

征驂稍靡靡去國方遲遲路遠南登岸情搖北上旗故



人憐別日旅鴈逐歸時歲晏無芳草將何寄所思

江上使風呈裴宣州

江路與天連風帆何淼然遙林浪出沒孤舫鳥聯翩常  
愛千鈞重深思萬事捐報恩非徇祿還逐賈人船

谿行寄王震

山氣朝來爽谿流日向清遠心何處愜閒棹此中行叢  
桂林間待羣鷗水上迎徒然適我願幽獨為誰情

將至岳陽有懷趙二

湘浦多深林青冥晝結陰獨無謝客賞况復賈生心  
草色雖云發天光或未臨江潭非所遇為爾白頭吟

南陽道中作

登郢屬歲陰及宛惜所適復聞東漢主遺此南都迹  
佳氣藹厥初霸圖紛在昔茲邦稱貴近與世嘗薰赫  
遭遇感風雲變衰空草澤不識鄧公樹猶傳陰后石  
驅馬歷闐闔荆榛翳阡陌事去物無象感來心不懌  
懷古對窮秋興言傷遠客眇默遵歧路辛勤弊行役  
雲鴈號相呼

林廩走自索顧憶徇書劒未嘗安枕席豈暇墨突黔空  
持遼豕白迷復期非遠歸歟賞農隙

西江夜行

遙夜人何在澄潭月裏行悠悠天宇曠切切故鄉情外  
物寂無擾中流澹自清念歸林葉換愁坐露華生猶有  
汀洲鶴宵分乍一鳴

使還湘水

歸舟宛何處正值楚江平夕逗煙村宿朝緣浦樹行于

役已彌歲言旋今愜情鄉郊尚千里流目夏雲生

初發道中寄遠

日夜鄉山遠秋風復此時舊聞胡馬思今聽楚猿悲念  
別朝昏苦懷歸歲月遲壯圖空不息常恐髮如絲

湘中作

湘流繞南嶽絕目轉青青懷祿未能已瞻途屢所經煙  
嶼宜春望林猿莫夜聽永路日多緒孤舟天復冥浮沒  
從此去嗟嗟勞我形

自湘水南行

落日催行舫，逶迤洲渚間。  
誰云有物役，乘此更休閒。  
暝色生前浦，清暉發近山。  
中流澹容與，唯愛鳥飛還。

南還湘水言懷

拙宦今何有，勞歌念不成。  
十年乖夙志，一別悔前行。  
歸去田園老，僮來軒冕輕。  
江間稻正熟，林裏桂初榮。  
魚意思在藻，鹿心懷食苹。  
時哉苟不達，取樂遂吾情。

初入湘中有喜

征鞍窮郢路歸棹入湘流望鳥唯貪疾聞猿亦罷愁兩  
邊楓作岸數處橘為洲却計從來意翻疑夢裏遊

商洛山行懷古

園綺值秦末嘉遁此山阿陳迹向千古荒途始一過碩  
人久淪謝喬木自森羅故事昔嘗覽遺風今豈訛泌泉  
空活活樵叟獨皤皤是處清暉滿從中幽興多長懷赤  
松意復憶紫芝歌避世辭軒冕逢時解薜蘿盛明今在  
運吾道竟如何

耒陽溪夜行

乘夕棹歸舟緣源路轉幽月明看嶺樹風靜聽溪流嵐  
氣船間入霜華衣上浮猿聲雖此夜不是別家愁

江上

長林何繚繞遠水復悠悠盡日餘無見為心那不愁憶  
將親愛別行為主恩酬感激空如此芳時屢已道

自彭蠡湖初入江

江岫殊空濶雲煙處處浮上來羣噪鳥中去獨行舟牢

落誰相顧逶迤日自愁更將心問影于役復何求

赴使瀧峽

谿路日幽深寒空入兩嶽霜清百丈水風落萬重林夕  
鳥聯歸翼秋猿斷去心別離多遠思況乃歲方陰

湖口望廬山瀑布泉

萬丈洪泉落迢迢半紫氛奔飛下雜樹洒落出重雲日  
照虹蜺似天清風雨聞靈山多秀色空水共氤氲

彭蠡湖上



沿涉經大湖湖流多行泐決晨趨北渚逗浦已西日所  
適雖淹曠中流且閒逸瑰詭良復多感見乃非一廬山  
直陽潁孤石當陰術一水雲際飛數峯湖心出象類何  
交紕形言豈深悉且知皆自然高下無相恤

經江寧覽舊跡至玄武湖

南國更數世北湖方十洲天清華林苑日晏景陽樓果  
下迴仙騎津傍駐綵旆鳬鷺喧鳳管荷芰鬪龍舟七子  
陪詩賦千人和棹謳應言在鎬樂不讓橫汾秋風俗因

紆慢江山成易由駒王信不武孫叔是無謀佳氣日將  
歇霸功誰與修桑田東海變麋鹿姑蘇遊否運爭三國  
康時劣九州山雖幕府在館豈豫章留水淀還相閱菱  
歌亦故道雄圖不足問唯想事風流

入廬山仰望瀑布水

絕頂有懸泉喧喧出煙杪不知幾時歲但見無昏曉閃  
閃青崖落鮮鮮白日皎洒流濕行雲濺沫驚飛鳥雷吼  
何噴薄箭馳入窈窕昔聞山下蒙今乃林巒表物情有

詭激坤元昌紛矯默然置此去變化誰能了

出為豫章郡途次廬山東巖下

茲山鎮何所乃在澄湖陰下有蛟螭伏上與虹蜺尋靈  
仙未始曠窟宅何其深雙闕出雲峙三宮入煙沉攀崖  
猶昔境種杏非舊林想像終古跡惆悵獨往心紛吾嬰  
世網數載忝朝簪孤根自靡託量力況不任多謝周身  
防常恐橫議侵豈匪鷁鴻列惕如泉壑臨迨茲刺江郡  
來此滌塵襟有趣逢樵客忘懷狎野禽棲閒義未果用

拙歡在今願言答休命歸事邱中琴

巡屬縣道中作

春令夙所奉駕言遵此行途中却郡掾林下招村氓至  
邑無紛劇來人但歡迎豈伊念邦政爾實在時清短才  
濫符竹弱歲起柴荆再入江村道永懷山藪情矧逢陽  
節獻默聽時禽鳴迹與素心別感從幽思盈流芳日不  
待夙志蹇無成知命且何欲所圖唯退耕華簪極身泰  
衰鬢慙木榮苟得不可遂吾其謝世嬰

南還以詩代書贈京都舊寮

薄宦晨昏闕遵尊義取斯窮愁年貌改寂歷爾胡為不  
諂詞多忤無容禮益卑微生尚何有遠跡固其宜思擾  
梁山曲情遙越鳥枝故園從海上良友邈天涯雲雨歎  
一別川原勞載馳上慙伯樂顧中負叔牙知去國誠寥  
落經途弊險巇歲逢霜雪苦林屬蕙蘭萎欲贈幽芳歇  
行悲舊賞移一從關作限兩見月成規冉冉窮年籥行  
行盡路歧征鞍稅北渚歸帆指南垂樹晚猶蔥蒨江寒

尚渺瀰土風從楚別山水入湘竒石瀨相奔觸煙林更  
蔽虧層崖夾洞浦輕舸泛澄漪松篠行皆傍禽魚動輒  
隨惜哉邊地隔不與故人窺疇昔陪駕鷺朝陽振羽儀  
來音雖寂寞接景每逶迤朝罷冥塵事賓來話酒卮邀  
歡逐芳草結興選華池及此風成歎何時霧可披自憐  
無用者誰念有情離望美音容濶懷賢夢想疲因聲達  
霄漢持拙守東陂

初發道中贈王司馬兼寄諸公

昔歲嘗陳力中年退屏居承顏方弄鳥放性或觀魚曾  
是安疵拙誠非議卷舒林園事益簡煙月賞恒餘不意  
棲愚谷無階奉詔書湛恩均大造弱植愧空虛肅命趨  
仙闕僑裝撫傳車念行開祖帳憐別降題輿誰謂風期  
許叨延禮數殊義沾投分末情及解攜初追餞扶江界  
光輝燭里閭子雲應寂寞公緒為吹噓景物春來異音  
容日向疎川原行稍穩鐘鼓聽猶徐林隔王公舉雲迷  
班氏廬戀親唯嗚思德更躊躇徇義當由此懷安乃

闕如願酬明主惠行矣豈徒歟

夏日奉使南海在道中作

緬然萬里路赫曦三伏時飛走逃深林流爍恐生疵行  
李豈無苦而我方自怡肅事誠在公拜慶遂及私展力  
慚淺效銜恩感深慈且欲湯火蹈况無鬼神欺朝發高  
山阿夕濟長江湄秋瘴寧我毒夏水胡不夷信知道存  
者但問心所之呂梁有出入乃覺非虛詞

湏陽峽



行舟傍越岑窈窕越溪深水闇先秋冷山晴當晝陰重  
林間五色對壁聳千尋惜此生遐遠誰知造化心

使至廣州

昔年嘗不調茲地亦遭迴本謂雙鳬少何知駟馬來人  
非漢使索郡是越王臺去去雖殊事山川長在哉

春江晚景

江林皆秀發雲日復相鮮征路那逢此春心益眇然興  
來祇自得佳處莫能傳薄暮津亭下餘花滿客船

與王六履震廣州津亭曉望

明發臨前渚寒來淨遠空  
水紋天上碧日氣海邊紅  
景物紛為異人情賴此同  
乘桴自有適非欲破長風

初發曲江谿中

溪流清且深松石復陰臨  
正爾可嘉處胡為無賞心  
我由不忍別物亦有緣侵  
自匪嘗行邁誰能知此音

自始興谿夜上赴嶺

嘗蓄名山意滋為世網牽  
征途屢及此初服已非然  
日

落青巖際谿行綠篠邊去舟乘月後歸鳥息人前數曲  
迷幽嶂連圻觸閭泉深林風緒結遙夜客情懸非梗胡  
為泛無膏亦自煎不知于役者相樂在何年

奉使自藍田玉山南行

征驂入雲壑始憶步金門通籍微軀幸歸途明主恩匪  
唯徇行役兼得慰晨昏是節暑云熾紛吾心所尊海縣  
且悠緬山郵日駿奔徒知惡囂事未暇息陰論曉武經  
陳迹衡湘指故園水聞南澗險煙望北林繁遠靄千巖

合幽聲百籟喧陰泉夏猶凍陽景晝方暾懿此高深極  
徒令夢想存盛明期有報長往復奚言

巡按自灘水南行

理棹雖云遠飲水寧有惜況乃佳山川怡然傲潭石奇  
峯岌前轉茂樹隈中積猿鳥聲自呼風泉氣相激目因詭容  
逆心與清暉滌紛吾謬執簡行郡將移檄即事聊獨歡  
素懷豈兼適悠悠詠靡鹽庶以窮日夕

使還都湘東作

蒼庚昨歸候陽鳥今去時感物遽如此勞生安可思養  
真無上格圖進豈前期甘節往來苦壯容離別衰盛明  
非不遇弱操自云私孤櫟清川渚征衣寒露滋風朝津  
樹落日夕嶺猿悲牽役而無悔坐愁祇自怡當須報恩  
已終爾謝塵縑

旅宿淮陽亭口號

日暮荒亭上悠悠旅思多故鄉臨桂水今夜眇星河暗  
草霜華發空亭鴈影過興來誰與晤勞者自為歌

欽定四庫全書

目錄  
卷四

子

曲江集卷四

欽定四庫全書

曲江集卷五

唐 張九齡 撰

詩

望月懷遠

海上生明月天涯共此時  
情人怨遙夜竟夕起相思  
滅燭憐光滿披衣覺露滋  
不堪盈手贈還寢夢佳期

秋夕望月

清迥江城月流光萬里同所思如夢裏相望在庭中皎  
潔青苔露蕭條黃葉風含情不得語頻使桂華空

詠鷺

海鷺何微眇乘春亦暫來豈知泥滓賤祇見玉堂開繡  
戶時雙入華軒日幾迴無心與物競鷹隼莫相猜

詠史

大德始無頗中智是所是居然已不一況乃務相詭小  
道致泥難巧言因萋毀穰侯或見遲蘇生得陰揣輕既



長沙傳重亦邊郡徙勢傾不幸然跡在胡寧爾滄溟所  
為大江漢日來委澧水雖復清魚鼈豈游此賢哉有小  
白讎中有管氏若人不世生悠悠多如彼

勅賜寧王池宴

賢王有池館明主賜春遊淑氣林間發恩光水上浮徒  
叅和鼎地終謝巨川舟皇澤空如此輕生莫可酬

龍門旬宴得月字韻

恩華逐芳歲形勝兼韶月中席傍魚潭前山倚龍闕花

迎妙妓至鳥避仙舟發宴衍良在茲再來情不歇

天津橋東旬宴得歌字韻

清洛象天河東流形勝多朝來逢宴喜春盡却妍和泉  
鮪歡時躍林鶯醉裏歌賜恩頻若此為樂奈人何

上陽水牕旬宴得移字韻

河漢非應到汀洲忽在斯仍逢帝樂下如逐海槎窺春  
賞時將換皇恩歲不移今朝遊宴所莫比天泉池

故刑部李尚書荆谷山集會

嘗聞繼老聃身退道彌耽結宇倚青壁疏泉噴碧潭苔  
石隨人古煙花寄酒酣山光紛向夕歸興杜城南

三月三日申王園亭宴集

稽亭追往事睢苑勝前聞飛閣凌芳樹華池落綵雲藉  
草人留酌銜花鳥赴羣向來同賞處惟恨碧林曛

恩賜樂遊園宴

實筐延後命供帳序羣公形勝宜春接威儀建禮同晞  
陽人似露解愠物從風朝慶千齡始年華二月中輝光

變草木和氣發絲桐歲歲長無事徒知樂九功

驪山下逍遙公舊居遊集

君子體清尚歸處有兼資雖然經濟日無忘幽棲時卜  
居舊何所休澣嘗來茲岑寂罕人至高深獲我思松澗  
聆遺風蘭林覽餘滋往事誠已矣道存猶可追遺子後  
黃金作歌先紫芝明德有自來奕世皆秉彝豈與磻溪  
老崛起周太師我心希碩人逮此問元龜怡悵既懷遠  
沉吟亦省私已云寵祿過況在華髮衰軒蓋有迷復邱

壑無磷緇感物重所懷何但止足斯

祠紫蓋山經玉泉山寺

指塗躋楚望策馬望荆岑稍稍松篁入泠泠澗谷深觀  
奇逐幽映歷險忘嶮嶮上界投佛影中天揚梵音梵香  
懺在昔禮足誓來今靈異若有對聖先其可尋高僧聞  
逝者遠俗是初心鮮駁經行處猿啼燕坐林歸真已寂  
滅留迹豈埋沈法地自茲廣何云千萬金

冬中至玉泉山寺屬窮陰冰閉崖谷無色及仲

春行縣復往焉故有此作

靈境信幽絕芳時重暄妍再來及茲勝一遇非無緣萬  
木柔可結千花敷欲然松間鳴好鳥林下流清泉石壁開  
精舍金光照法筵真空本自寂假有聊相宣復此灰心  
者仍追巢頂禪簡書雖有畏身世亦相捐

郢城西北有大古塚數十觀其封域多是楚時  
諸王而年代久遠不復可識唯直西有樊妃塚  
因後人為植松栢故行路盡知之

蘋藻生南澗，蕙蘭秀中林。嘉名有所在，芳氣無幽深。  
楚子初逞志，樊妃嘗獻箴。能令更擇士，非直罷從禽。  
舊國皆湮滅，先王亦莫尋。唯傳賢媛隴，猶結後人心。  
牢落山川意，蕭疎松柏陰。破牆時直上，荒徑或斜侵。  
惠問終不絕，風流獨至今。千春思窈窕，黃鳥復哀音。

戲題春意

一作江南守江林，三四春相鳴不及鳥。  
相樂喜關人日，守朱絲直年催華髮新。  
淮陽祇有臥持此度芳辰。

同綦母學士月夜聞鴈

棲宿豈無意飛飛更遠尋  
長途未及半中夜有遺音  
月思關山笛風號流水琴  
空聲兩相應幽感一何深  
避繳歸南浦離羣叫北林  
聯翩俱不定憐爾越鄉心

立春日晨起對積雪

忽對林亭雪瑤華處處開  
今年迎氣始昨夜伴春迴  
玉潤窻前竹花繁院裏梅  
東郊齋祭所應見五神來

庭梅詠



芳意何能早孤榮亦自危更憐花蒂弱不受歲寒移朔  
雪那相妬陰風已屢吹馨香雖尚爾飄蕩復誰知

照鏡見白髮聯句

宿昔青雲志蹉跎白髮年誰知明鏡裏形影自相憐

折楊柳

纖纖折楊柳持此寄情人一枝何足貴憐是故園春遲  
景那能久流芳不及新更愁征戍客容容鬢老邊塵

巫山高

巫山與天近煙景長青熒此中楚王夢夢得神女靈神  
女去已久雲雨空冥冥唯有巴猿嘯哀音不可聽

剪綵

姹女矜容色為花不讓春既爭芳意早誰待物華真葉  
作參差發枝從點綴新自然無限態長在艷陽人

聽箏

端居正無緒那復發秦箏纖指傳新意繁絃起怨情悠  
揚思欲絕掩抑態還生豈是聲能感人心自不平

賦得自君之出矣

自君之出矣不復理殘機思君如滿月夜夜減清輝

荊州作二首

先達志其大求意不約文士伸在知己已況仕於君微  
誠夙所尚細故不足云時來忽易失事往良難分顧念  
凡近姿焉欲殊常勲亦以行則是豈必素有聞千慮且  
猶失萬緒何其紛進士苟非黨免相安得羣衆口金可  
鑠孤心絲共棼意忠仗朋信語勇同敗軍古劍徒有氣

幽蘭祇自薰高秩向所忝於義如浮雲

其二

千載一遭遇往賢所至難問余奚為者無階忽上搏明  
聖不世出翼亮非苟安崇高自有配孤陋何足干遇恩  
一時來竊位三歲寒誰謂誠不盡知窮力亦殫雖致負  
乘寇初無挾術鑽浩蕩出江湖翻覆如波瀾心傷不材  
樹自念獨飛翰狗義在匹夫報恩猶一餐況乃山海澤  
效無毫髮端內訟已慙沮積毀今摧殘胡為復惕息傷

鳥畏虛彈

在郡秋懷二首

秋風入前林蕭瑟鳴高枝寂寞遊子思寤歎何人知宦  
成名不立志存歲已馳五十而無聞古人深所疵平生  
去外飾直道如不羈未得操割效忽復寒暑移物情自  
古然身退毀亦隨悠悠滄江渚望望白雲涯路下霜且  
降澤中草離披蘭艾若不分安用馨香為

其二

庭蕪生白露歲候感遐心策蹇慙遠途巢枝思故林  
小人恐致寇終日如臨深魚鳥好自逸池籠安所欽掛冠  
東都門採蕨南山岑議道誠愧昔覽分還愜今無然憂  
成老空爾白頭吟

郡府中每晨興輒見羣鶴東飛至暮又行列而  
返哢唳雲路甚和樂焉予愧獨處江城常目送  
此意有所羨遂賦以詩

雲間有數鶴撫翼意無違曉日東田去宵煙北渚歸謹

呼良自適羅列好相依遠集長江靜高翔衆鳥稀豈煩  
僂子馭何畏野人機却念乘軒者拘留不得飛

忝官二十年盡在內職及為郡嘗積戀因賦詩  
馬

江流去朝宗晝夜茲不舍仲尼在川上子牟存闕下聖  
達有由然孰是無心者一郡苟能化百城豈云寡愛禮  
誰為羊戀主吾猶馬感初時不載思奮翼無假閑字嘗  
自閑沉心何用寫攬衣步前庭登陴臨曠野白水生迢

通清風寄蕭洒願言采芳澤終朝不盈把

初秋憶金均兩弟

江渚秋風至他鄉離別心孤雲愁自遠一葉感何深憂  
喜嘗同域飛鳴忽異林青山西北望堪作白頭吟

二弟宰邑南海見羣鴈南飛因成詠以寄

鴻鴈自北來嗷嗷度煙景嘗懷稻梁惠豈憚江山永小  
大每相從羽毛當自整雙鳬侶晨泛獨鶴參宵警為我  
更南飛因書至梅嶺



將發還鄉示諸弟

歲陽亦頽止林意日蕭撼云胡當此時緬邁復為客至  
愛孰能捨名義來相迫負德良不貲輸誠靡所惜一木  
逢厦構纖塵願山益無力主君恩寧利客卿壁去去榮  
歸養憮然歎行役

叙懷二首

弱歲讀羣史抗迹追古人被褐有懷玉佩印從負薪志  
合豈兄弟道行無賤貧孤根亦何賴感激此為鄰

其二

晚節從卑秩歧路良非一既聞持兩端復見挾三術木  
瓜誠有報玉楮論無實已矣直躬者平生壯圖失去  
勿重陳歸來茹芝朮

秋懷

感惜芳時換誰知客思懸憶隨鴻向暖愁學馬思邊留  
滯機還息紛拏網自牽東南起歸望何處是江天

雜詩五首

孤桐亦胡為百尺傍無枝疎陰不自覆修幹欲何施高  
岡地復迥弱植風屢吹凡鳥已相噪鳳凰安得知

其二

蘿薦必有託風霜不能落酷在蘭將蕙甘從葵與藿運  
命雖為宰寒暑自迴薄悠悠天地間委順無不樂

其三

良辰不可遇心賞更蹉跎終日塊然坐有時勞者歌庭  
前攬芳蕙江上託微波路遠無能達憂情空復多

其四

湘水弔靈妃斑竹為情緒漢水訪遊女解佩無誰與同  
心不可見異路空延佇浦上青楓林津傍白沙渚行吟  
至落日坐望祇愁予神物亦豈孤佳期竟何許

其五

木直幾自寇石堅亦他攻何言為用薄而與火膏同物  
累有固然誰能取徑通纖纖良田草靡靡唯從風日夜  
沐甘澤春秋等芳叢生性苟不夭香臭誰為中道家貴

至柔儒生何固窮終始行一意無乃過愚公

故刑部李尚書挽歌詞三首

仙宗出趙北相業起山東明德嘗為禮嘉謀屢作忠論  
經白虎殿獻賦甘泉宮與善今何在蒼生望已空

其二

宿昔三台踐榮華駟馬歸印從青瑣拜翰入紫宸揮題  
劍恩方重藏舟事已非龍門不可望感激涕沾衣

其三

永歎常山寶沉埋京兆阡同盟會五月華表記千年渺  
漫野中草微茫空裏烟共悲人事絕唯對杜陵田

故徐州刺史贈吏部侍郎蘇公挽歌詞三首

韋玄方繼相荀爽復齊名在貴兼天爵能賢出世卿學  
聞金馬詔神見玉人清藏壑今如此為山遂不成

其二

相如只謝病子敬忽云亡豈悟瑤臺雪分雕玉樹行清  
規留草議故事在封章本謂三公啓而今歿始揚

其三

返葬長安陌  
秋風簫鼓悲  
奈何相送者  
不是平生時  
寒影催年急  
哀歌助輓遲  
寧知建旆罷  
丹旆向京師

故榮陽君蘇氏挽歌詞三首

門緒公侯列  
嬪風詩禮行  
松蘿方有寄  
桃李忽無成  
劒去雙龍別  
雛哀九鳳鳴  
何言嶧山樹  
還似半心生

其二

永嘆芳魂斷  
行看草露滋  
二宗榮盛日  
千古別離時  
竟

罷生芻贈空留畫扇悲客車候曉發何歲是歸期

其三

縞服紛相送玄局翳不開更悲泉火滅徒見柳車迴舊  
室容衣奠新塋拱樹栽唯應月照簾潘岳此時哀

眉州康司馬挽歌詞

家受專門學人稱入室賢劉楨徒有氣管輅獨無年謫  
去長沙國魂歸京兆阡從來匣中劍埋沒罷衝天

題畫山水障



心累猶不盡果為物外牽偶因耳目好復假丹青妍嘗  
抱野間意而迫區中緣塵事固已矣秉意終不遷良工  
適我願妙墨揮巖泉變化合羣有高深侔自然置陳北  
堂上做像南山前靜無戶庭出行已茲地偏萱草憂可  
樹合歡忿亦蠲所因本微物況乃憑幽筌言象會自泯  
意色聊自宣對翫有佳趣使我心眇綿

曲江集卷五